



詩
雜詩

少華稿

四





RARE
BOOK
chip
2.30
V.4

~~1~~
~~3651~~
~~N15~~
~~v.4~~

雷淵集卷之七目錄

詩

林忠愍廟次拙翁韻

入郭二三從人獻詩仍和之

和碩翁疊前韻見寄謝惠空冊二十卷

外補蔚州途中次李尚書士受贈別韻

次太守韻志懷

蔚州客館次拙翁寄示韻

登太和樓用宋人韻

清道守奎剏伯跋涉三省見枉和其首尾吟

一鶴樓以萍緣二字分韻得萍字

次劉伯緣字

和硯翁夢伯玉感吟長篇

宿花山館太守送妓睡深不省也覺而贈詩

次劉伯寄別韻

留宣城數日無聊有衡為誦大學章句喜贈

懷石馬次朱先生遊石馬韻

余之遷鐵原景孺謫北關東門外分道

七哀

謫廬得韻

登北寬亭

槐下井

籬外有一樹桃花多風易衰

和拙翁解嘲

從里中父老問府內名勝可遊者喜吟

燈花四首

野老

得舍弟書却寄

食辛甘菜

兒孫寄詩至頗見詞致喜用其韻

義足

次贈金上舍仁謙

肩輿

李承旨平一牘尾附詩和之二首

和拙翁過青松子朴叔士典故宅感吟韻

贈朴弟敏源教源

得宣城舍侄書喜疊寄弟韻寫牘尾

旅舍十咏效擊壤體

猿

期拙老朴弟遯溪獵魚雨不果

乍晴赴遜溪期贈主人朴弟景先

文源

遙叩靈泉菴次景先見屬韻

題主人草堂

晝眠

燕至驚不來

待家信不至寄家弟

次朴弟景先見寄韻

漫吟示拙翁

山中有居士

彈琴

送人入洛中

平康太守惠雪華踐

有客言將遊金剛余謂山中脚目易窮遂戲吟
園中見曲木憐而賦之二首

題古畫漁樵

漢中朋友有書答以一詩

驚壘成

豎子有樊雉者放之林中

新晴陟舍北高丘聞田父語

有友用后山韻

市閤

登安養寺

携琴遊寺南小硯

上方經僧乞詩為賦一首不必題贈

止寬亭登望

與拙翁遊金鶴寺歸路遇朴弟戲贈二首

聞鄭老元伯散登仙畫家亦絕矣為賦長句

嘲拙翁苦吟

登滄浪亭

劉伯自清道陞資以紅帶寄贈

戲書花山女詩卷

李判書士受寄梅花軸時余有北關之行和別
安邊東軒次辟上清陰韻

遊南川松亭

駕鶴樓次辟上圃隱韻

四月己亥入金剛至南山驛秣馬謹次先集韻
宿高山村次拙翁言志韻

曉過鐵嶺用東岳韻

花川途中用澤堂韻簡淮陽守俞繼之

彦述

長安寺初見金剛數峯用農巖韻

坐明鏡臺窺玉鏡潭拈韻

鳴淵

宿表訓寺贈載森長老用簡易韻

登天逸臺觀衆香毗盧諸峯有作

正陽寺拈遙字

登歇惺樓用三淵韻又簡繼之

還宿表訓憇白華菴三淵讀書處也

入萬瀑洞觀九潭賦長句一首

摩訶衍溪上遇桂樹有吟

妙吉祥觀懶翁畫如來石真

榆砦石上題

曉登佛頂臺

下佛頂行苦霧中探風穴鶴巢五松其險如蜀
百川橋馬僕見待送肩輿僧還松林

至九龍淵洞口同行欲占易以決行止余不入
始泛舟三日浦用老杜白沙渡韻

高城東巖觀日出起而拜之書其石曰拜日巖
誦李白白雲歌仍和之

海山亭

和前述夢作

叢石

鶴浦元帥臺登眺

沙峯

大瀛臺觀海用范希文觀潮十韻

雪峯寺送拙翁入洛

戲次金副學稚明贈妓韻

金孺文與其弟禮仲

和澤

自象山來登樓有吟

疊前韻

疊前韻奉寄仙樓二詞伯求和

登降仙樓拈唐人韻

新晴登樓

儒武試藝日設宴于降仙樓吟奉席上諸君

夜坐和申生成玉

城

韻

登黃州竹樓

金知事

鎮東

輓

次郭負外子施

聖濟

見寄韻

次金都正劉伯壽席韻

上元日獨吟

贈金生河壽

權處士

揆

輓

次有衡詠鶴

李侍郎原明以詩求鶴以一鶴撤贈和其韻

余以鶴贈原明來使鞭鶴原明撻之有詩報信
戲題次兜革韻

用金生河壽軸中韻送其省親之行

和金同樞劉伯寄示韻二首

次人寄詩賀致政

金士舒相國詩賀致仕奉酬

次俞四宰良甫

取基

賀致仕韻

初夏乙未集鄭判敦陽來宅和季章用祁公韻

有懷鑑湖香山吟成一詩

奉詔鄭尚書陽來賀致政韻

榮老堂八景次兜輩韻

雷淵集卷之七

詩

林忠愍廟次拙翁韻

霜雪開生面山川繞短碑
知心惟獨步薄海一雄姿
死亦崇禎鬼生誰羯狗為
寒天數掬淚端不作秋悲
入郭二三從人獻詩仍和之

不為客遊久鬢毛元自疎
雲寒鳥嶺外水落鴈沙餘
城郭終須入林泉事又虛
童孫也會意拂壁出塵書
和硯翁疊前韻見寄謝惠空冊二十卷

東東藤編寄意長著書真媿古山陽
端教象玉粧成

匣只怕兒童攤滿堂皎白應悲新墨染朱黃終借老
毫光晴窓閑罷還高枕更好相偎到睡鄉

外補蔚州途中次李尚書士受贈別韻

北風和雪馬前飛數點文星不放輝莫笑浮名憂患
始詞垣猶有未傳衣

余以文衡薦望忤
旨黜補故云

次太守韻志懷

在途病不記日月及到禮安太守迎拜續辦
一筵始悟今日乃余周甲初度也以余衰疾
未數月間再涉重嶺來謁父母祠版侍歡慈
堂而又適及是日殆非人力所至亦莫非

聖恩攸暨也

燕喜慈闈偶此辰
乍回霜雪作陽春
此身此地非吾力
造化從來太好新

蔚州客館次拙翁寄示韻

行窮滄海始言休
踏盡江南數十州
孤館鷄鳴殘夢罷
日華浮上枕邊樓

登太和樓用宋人韻

異鄉多白髮
平世困虛名
荒戍常依海
屯雲欲作城
歲華天外盡
宦跡斗南清
惟有波中鳥
遙舍不語情
清道守金剛
伯跋涉三宿
見枉郡齋
千里命駕

之風不意於今乃見和其首尾吟一首以謝之
人生何處不相逢自古雲龍以類從常恨重關遮遠
目誰教絕海滯踈蹤情同萍帶終須合喜入燈花自
在濃南嶽竒遊存宿計人生何處不相逢

一鶴樓以萍緣二字分韻得萍字

無心吾愛水中萍聚散隨緣各忘形不向急流相白
引幽期多在白蘋汀

次劉伯緣字

笙鸞何處問群仙九點煙光抱膝前翠浪天涵神馬
窟紫氛星繞老人躔三躰重嶺終竒遇一笑他鄉也

宿緣浩蕩空菴賓出日詩殘滿載使君船

和澗翁夢伯五感吟長篇

一自月谷棄我去隻影四海行無偶拍臂嘻笑附耳
語人謂知己我則否歲寒心期向何許獨有鰲山老
太守身雖潦倒氣尚豪一吟百篇真舊習憐我清時
海上謫憐我衰齡周一甲山川跋涉遙相訪官齋促
席披心肝久知榮辱有前定嶺海何異吾廬安垂老
難忘是舊遊語到月谷悄無歡朝來見君述夢詩升
載音容想七分海水洋洋山峩峩幾抱牙琴歎離群
平生憂我太踈迺勸我休官歸故鄉叮嚀此意託夢

傳聞緘一讀，心悲傷。我欲憑君語，月谷去勿忽。忽來
勿懶從，今夜夜入君夢席。邊容我一擗，散

宿花山館太守送妓睡深不省也覺而贈詩

霜重孤衾睡不知，一燈明暗對蛾眉。芳緣未托巫山
夢，錦帶空留學士詩。

次剛伯寄別韻

己卯

窮通百年事不卜也，心知雨裏園紅老。霜邊澗翠遲
相忘，魚自樂。高舉鴈如期，玆重鰲山守。黃柑帶別詩
留宣城，數日無聊有衡輒為余誦大學章句盡

一編，賴以忘懷。喜贈

短褐風霜裏殘經旅泊餘朱門衣貉者能誦幾編書

懷石馬次朱先生遊石馬韻

廣陵石馬余樂之亟往來亦不能十日淹也
為屋子未樹已自海上歸薄寄人郊亭負郭
聲塵惱人不如石馬之寧荒而奧也會讀紫
陽詩有修舉歲事與隣曲携壺石馬作他遊
石馬亦四五什則又喜其里名也偶符先生
之所扶屨歸志益浩然姑用其韻

不才久妨賢我馬行當休外補亦 恩私薄言海上
遊虛曠愜素賞高枕俯長流選日弄小舸汎洄逐群

鷗及茲返京國棲息非吾丘村間連市井薄俗難與
儔側身懷故里歸計何當酬園木茁幾行得免樵斤
不晨檐梳短髮春風散百憂古詩詠還賔千載如相
求

余之遷鐵原也尹郝憲景孺謫北關東門外分
道尹李章亦來班荆小話輒用紫陽故事各次
沈隱侯贈范安成詩以為別

歧路久彷徨孤負田園期不才當見棄豈曰無清時
世道雖百變寸心貴自持芳澤寒幽蘭願言贈所思

七哀

余交游寡而今且盡矣歎其得之艱而失之
忽也作七哀嗚呼余老不復讀書志日荒業
日退而又不得朋友為之扶策焉其哀之乃
所以自悲也

伯氏 贈修撰太華公

伯也玉如人溫溫聲氣樂滿肚貯希音時則韶護作
忽奮獄中筆清秋擊一鶚壯圖局小年魯野踣一角
松聲老太華夜月叫孤鶴

余贈太華詩曰我方為鶴
子為松太華亦云先生如

野鶴太華
有雲松

大學士月谷吳公伯玉

伯玉不常有曠世期一遇賢愚與俱化徹皮見冲素
數出憂國淚秋懷寫酒賦空遺沙中跡誰測冥冥羽
生平一古劍蕭瑟廣陵樹

處士

贈持平逸軒俞公守甫

俞子古澤癯猶然笑顧及隱約布韋中卓爾見所立
百年有心策榮枯了不入耕圃樂而公急流輕一揖
竹里公嘗自謂吾得以輕於
進退三哥農圃之助為多 斷藁頗見志如聞皋魚
泣

金城縣令東溪李公夢與

李侯豪士流骨相太磊砢高談撼老屋期期多不可

在寒汝為冰百魔其如我符竹且寄傲簾閣棋聲墮
沉詠頻一世幾箇陳驚坐

國子祭酒貞菴閔公士元

徵士人中鳳一鳴當瑞世歛翮知所止彩章何容裔
喬木日已悴深涉不可揭 宮師忝同列莫繫谷駒

逝

余與公同仕
徠上遣史官

元孫輔養再上書請招
勉諭竟辭疾不出尋卒

清標俾也

忘驪水月常霽

禮部侍郎臨齋尹公景平

臨齋天下士幽貞獲所履由由鄉黨中鍾駟不奪志
義命見得真萬事何愠喜知我昭文琴一言了成毀

我歌孰令聽薄世無此耳

副提學潔齋李公子藝

德重

副學五堂英雍容席上珎橫經發顧問簪筆賁絲綸
嚶嚶惜名論進退知有身豈少金馬僚惠好在清淳
時憂猶病枕灑灑見精神

謫廬得韻

世外青牛遠途中白髮生北裝無暖席南食未懲羹
午枕連春氣晨書對雨聲隨緣聊飲啄簪笏本非情
登北寬亭

北寬亭上望悠然未信長安在日邊老木何關風雨

事寒松不記雪霜年詩書挂腹堪終歲行止由心莫
問天揔為逐臣難浪跡蓬壺咫尺隔雲煙

槐下井

巖泉自清冽况以槐露零我来困炎瘴飲之悅性靈
好物忌多取一日止兩瓶淡交不要名吾不續茶經
籬外有一樹桃花多風易衰

蜂蝶經營處初着一樹紅乍能滋夜雨終亦困春風
旅食驚時改幽居悟色空儂家有道友
東坡指松為道友
不負衰翁端

和拙翁解嘲

垂老應將木石群人間言語信難分耳中別有勻天
樂惟我能聞子不聞

從里中父老問府內名勝可遊者喜吟

多少東州勝聊憑里老探黃公精舍北

滄浪亭

金子廢

村南

三釜淵

谷遠川宜濯松高石可談聞言興自湧脚

踏更何堪

燈花

今夕是何夕火樹東西家誰似書帷裏自發燈中花

其二

拙翁占燈花公家有喜事伯五六十化無愠又何喜

其三

明月脫浮雲澹澹潭中舟
大道無險夷君子得自由

其四

枝頭百舌去花意更藹然
喧靜皆妙境君子見其全

野老

野老柴荆插不齊甕罌歌
側散童鷄持門健婦知憂
樂繞膝嬌兒任笑啼菜圃
經鋤多色種土房隨墁有
高低官場省罷無餘事
鼾睡颼颼到日西

得舍弟書却寄

乳子初扶戶孤孫不廢書
垣無經雨壞花有向陽舒

雲集
一
缺食今何怪為生昔已踈但教平問續東峽亦吾廬

食辛甘菜

一飽凡九束短短復長長共愛空盤色虛誇壓酒香
當歸好名號遠志一心腸莫以孤高節低頭讓首陽
兜孫寄詩至頗見詞致喜用其韻

自我遷謫去東城淹村孤坐歷陰晴階下綠竹初出
孫山鳥引子亦好聲眼中安得致汝曹愛而不見傷
我情努力詩書待爺歸莫將難字困先生

義芝

夢人授余一書目曰氣方曰留侯養氣之法

也字不滿數十余皆誦而志之既寤便空獨
不失義之二字余於是苦氣不利故神之衍
成一篇

我夢得書名氣方一葉二字凡九葉言是留侯養氣
法氣謂養氣方是法吾聞留侯帝者師晚節學道稱
辟穀赤松從遊亦寓言豈嘗真有書可讀書中文字
奧以奇在初寤時記皆得轉頭便空不可拾存者二
字曰義之或疑義之義未之恐是字逸句不屬我言
至道言不費所以昧昧而覺覺氣不徒養在善性行
無不慊義乃集義之於內氣不害乃知浩然非外襲

全體妙用二言減多一字衍少一闕嘗聞兩師化六
氣炎帝欲末僊不出豈有遺言在留侯秘藏百劫於
吾發吾老益厭人間事矣將乞骸還蓬蓽敬受神告
屬茲時稽首不遑銘之骨導和難老冰二事熊經虎
顧徒末術

次贈金上舍仁謙

上舍三淵底從侄也能詩愛山水中心見於
貌千峯一蹇委叩所不知之纍止亦其一奇
也遂用見屬韻以贈其歸

鞍馬亭亭澗日西
華扁宇落半春泥
看人君自傳心

遠爾客吾能舉手低萬事難窮此鬢髮孤懷惟有某
山溪累臣得去田園去莫說分攜說共攜

肩輿

大夫退在野肩輿用代車我貧闕車徒城裏亦肩輿
及茲遷謫來借馬煩里閭突兀騎兩擔藉以衣與書
東州盛名勝水石多村墟客窓坐如拘欲出無牛驢
地主老更健恠我太索居肩輿用二夫邀我七灣漁
我雖簪履舊於今編戶如退士以自為在禮不僭歟
平生一老藤扶我立前渠初晴日華鮮澹澹影冠裾
素石披翠帶詠躍亦多魚濠濮不在遠何往非樂且

李承旨平一牘尾附詩和之

虛舟亦何意風波信所經稍能離海口相望故山青

其二

可能無一事拂橐出殘經澹泊有何味客燈終夜青

和拙翁過青松子朴叔士興故宅感吟韻

高士幽棲地寒松表短扃出關牛是白

青松子常騎白犢

登

嶺鶴曾青薄試鳴琴政終悲獻玉刑莫教花石廢瀟灑子攸寧

贈朴弟敏源教源

賢父家風令子知長飢不廢舊墳荒壁中收拾千籤

在只為淵翁惜一鵠

得宣城舍姪書喜疊寄弟韻寫牘尾

燈前千里客嶺外一封書
離抱何能盡愁眉祇暫舒
南雲飛更遠北鴈去應疎
早晚歸田計須君理草廬

旅舍十詠效擊壤體

謂汝為君子隨人作顰笑
將謂汝小人在物無私照

右石鏡

寒亦不可褻熱亦不可捨
慎莫輕提挈深中有伏火

右鐵爐

簡朴人所賤溫厚吾所愛
為是貧時交白首相藉在

雷江集
右莞席

爾名為扶老努力慎所趨見險則便止莫待顛時扶

右藤杖

睡罷小屏裏何許脩眉翁每曉輒先在恐是黃石公

右寢屏

大硯宜館閣小硯宜山居用捨各隨時任渠相乘除

右行硯

病眼閣文字饒汝幾日間據或念丹經隱為看青山

右書几

久客須藥物囊底雜新陳平生康濟術纔及自家身

右藥囊

始為無事飲遂作大生理可笑行丐人握粟走茶市

右煙茶

喜君能卜夜來照百源襟歛處若含章逢時却盡心

右蠟燭

猿

乍能言語不離獸假與衣冠難似人頗恠化翁多事
在却於無用用機神

期拙老朴弟遜溪獵魚雨不果

雲圍纔合雨聲隨稍覺蒼零浸小籬軟綠緣畦蔬甲

拆輕黃浮野麥頭垂田家實慰三春望漁戶終孤一
日期琴裏殺心消得盡前溪無數上魚兒

乍晴赴遜溪期贈主人朴弟景先

文源

空霏初斷劣成朝一步出門意已遙知我魚梁應此
水問君鶯語定何條籃輿踏日忘深寺竹幘隨雲岸
遠霄始信小山真曉事只堪偕隱不須招

鄭惺菴見
道士瞑目

問曰彼鳥啼在第幾樹第幾枝
曰啼在眼中樹耳遠枝鄭大服

遙叩靈泉菴次景先見屬韻

推擠不去况投車雪鬢相飄意更加山外固應無尺
牘佛前何獨有楞迦霜蹄已老初辭厩風竹雖瘦不

倚葭間說黃亭饒勝矚可能乘興一驢耶

題主人草堂

累蹤未害遯溪濱況復仙鄉遠世塵耕處隴雲難贈
客釣餘汀月慣隨人圖書不改藏修舊藩落多須補
葺新知有別蹊通淨社夕陽清磬出林頻

晝眠

百短一長在平生無晝眠可知衰甚矣胡乃倦居然
不曰丈夫事難窮天地前惺惺須自起莫畫白紛顛
驚至鷺不來

歌者不來舞者來穿花拂柳一徘徊春城何處無歌

舞獨爾能尋故巷迴

待家信不至寄家弟

今日又無使羈愁連二旬
樹翻欺獨卧
厖吠慣非真
徑靜飄花盡
簷虛度燕頻
那將滿頭雪
還憶少年人

次朴弟景先見寄韻

晨驚騎馬夕禽來
久客愁眉與子開
餘興尚牽垂釣
處夢隨江月自徘徊

漫吟示拙翁

峽俗重端陽
招呼矜此夕
歌鼓樵牧室
鞦韆楊柳陌
窓間歌枕人
惆悵意何適
維揚桑梓丘
二載香火隔

宣城望更遠三月阻書尺吾道非木鐸胡為長作客
異鄉值名節客心轉愁寂相携有老友知心亮在昔
勸我早歸來歌詩屢感激喜子志高潔憐子頭空白
聊為適野謀連襟坐釣石

山中有居士

山中有居士隱處晝常雲一杖身同瘦古琴人不聞
磯空孤鶴守園熟老鼃分相見了無語乃知荷篠群
彈琴

吾不學新聲動指皆古調獨彈以自娛不恨知音少
巖底幽泉滴松間月孤照妙處與誰言曲罷復一嘯

送人入洛中

繞徑川沙白連簷木葉蒼歸人一馬瘦居士古琴長
麥野驚晨霧漁磯愛夕陽往來渾物理聊且信他鄉
平康太守惠雪華賤

溫如截玉潔勝紗輕薄誰曾比雪華合與翰林滋大
筆如何來賁逐臣家

有客言將遊金剛余謂山中脚目易窮不如讀
晦翁文之為坐遊遂戲吟

客從蛙井恟窮攀僧倦驢磨諱奧觀三月齋糧渾漫
興百篇含橐祗空還土亭思竭我洋際淵老神疲杖

屨間何似此翁茅屋下不航以海不梯山

園中見曲木憐而賦之

一曲不復直天心何不平可憐花與葉還自曲中生

其二

惟天生曲木惟聖作歌器怵惕心中傷方知造化意

題古畫漁樵

腰鎌老子暮歸村邂逅漁翁寄一言問爾小舟容我
否願乘春水入桃源

漢中朋友有書答以一詩

一字度江北舊遊應未闌但愁鬢髮變莫問路歧難

風水色無定霽雲飛更寬可能留面目他日好相看

王嘉叟語王龜齡曰吾輩會合不常但令常留面目異日可以相見龜齡每歎服之

鷺壘成

短智能分寸輕身易去來啣將泥似掬粧得屋如盃
薦實離橫切蛇宜慎小災逋氓無十室見此益堪哀
豎子有樊雉者放之林中

雉雖于樊鵲噪林可憐哀樂不同音盆中亦足觀生
理琴裏何曾有殺心在處網羅須避遠歸來藝澤好
藏深因思絕微窮瀛外幾箇羈臣動越吟

新晴陟舍北高丘間田父語

宿雨新晴雲葉舉，崇臯騁目窮洲渚。村長水入垂柳
前，草遠日照連天處。野田土柔牛力寬，牛蹄撥土如
投杵。人功天時欣相及，植藂壟首耆不去耕。夫髮半
皓，息耒草中向余語。吾聞大夫是官人，異鄉何事久
羈旅。見我耕田色若喜，我喜大夫能如此。我昔少年
時出家，作僧住山裏。秋潦捲時山水肥，愛游溪上戲
清泚。大魚小魚亦出來，銀唇朱鬣鱗與鯉。或躍擲我
衣，或泳在芳沚。自我為農去山門，時抱釣竹來江濱。
群魚見我影，駢首擺尾駭且犇。攢蒲掣荇不知處，水
底湜湜石可扞。昔也謂我忘機，故今也謂我心機存。

大夫顏色吾敢窺如我拄錫觀魚時不識車馬趨朝
日此日此心還不遺吾觀民牧牧民術頗亦類我釣
魚時但言釣得飽一飯未覺釣多令魚散城南鉅川
環一州皆我村氓故疆畔往年大浸十亡九祇今但
見橫波漫頽沙亂荻官所視逐戶誅稅猶舊貫困歟
廷知決網逃惟殘破棟寄彼岸去來冠蓋亦歎咨纔
入公府忘此歎幸公閒出開此抱不然有抱那得閒
爾言未竟我心惻有涕漻漻欲透眼我今放逐何能
為且代風謠記之簡

有友用后山韻

有友求道仍得貧枯枝颯颯無秋春白首相看不愧
色已斷此生作佳人有走心精手更速繕詩校文華
我屋往往佳句起衰慵嚶其鳴矣出幽谷有奴應客
嫺語言有婢在襄調涼溫夫我何事但遊遨亦有一
藤扶出門

市閤

日中市一閤沈沈聲氣橫甲咎乙欺心乙噴甲喪性
乙詬甲不直甲詈乙不正要勝不要下往復無究竟
君子貴知言於茲足深省心性理之原正直行之至
彼哉挈其要十分講學事惜乎能責人而不反諸已

所以遠於學終以聞猥止

盤安養寺

雲裏似無路肩輿來處來風霜千丈栢猿鶴一園苔
琴意幽泉發詩聲古磬催望京依北斗遙夜立前臺

携琴遊寺南小硯

負策涉山徑水木澹新霽幽禽無定棲厲翼選所憩
孤琴易為響度曲松風細豈無京國戀澤蘭寒滿袂
還為招隱詠崇阿有叢桂

上方經僧乞詩為賦一首不必題贈

上方幽竇隔人煙鐘磬悠揚是別天洞霤陰晴諸色

幻覓泉朝暮一聲連蓮花偈裏僧年住栢樹庭前佛
日懸不願碧紗籠妙句詩成吟罷子規邊

北寬亭登望

亭子得地平如案穹松百樹為風慢上砌心開北寬
字古人名物真不誕川迴野盤去未已直通咸關六
百里浮雲欲奪鐵嶺白返照微送金罍紫未覺滄海
今桑田汗漫如坐萬斛船極目天邊無去鴈惟有一
氣橫如煙去年二嶺困羊腸今日隱几得康莊世間
平陂蓋如此一隅可以窮圓方登臨奚止心眸快城
池防禦仍可戒松江歌曲大風情弓裔興亡安足歎

與拙翁遊金鶴寺歸路遇朴弟戲贈

山僧呼我謫來仙，爭挽籃輿下佛天。
呼我為仙亦不僭，老聃在後葛洪前。

其二

輕輿超忽似飛仙，倦攢崎嶇難上天。
且與此翁饒一步，去來都在少年前。

朴君蓋欲躡我于金鶴而去來皆不及

聞鄭老元伯散登仙畫象亦絕矣，為賦長句。

鄭老丹青妙天東，三山七澤羅胸中。
萬種生姿媚空素，彩毫落紙驚化翁。
看君筆意在象外，直假我洋聲絲桐。
世間哀樂不到眉，秋星爍爍清雙瞳。
得我新詩

信手作數紙香冥空翠色牛背醉翁不知路一谿流
水松花落是誰披蓑五老頂去入丹丘蹋白石青松
兩樹砮崖古崖首飛泉飲一鹿更誰携琴香爐北來
坐金流第二曲自言九十無所求得君一語萬事足
已覺苦心向千古更惜老手難重得噓之恐飛握恐
滅坐卧顧眄當拱壁朝暉稍發雲處白暝禽欲擲煙
中碧乃知造化在墨妙復歎知者惟我獨且待新修
山水記與我為三老茆屋只今飄泊去長安南窺滇
海東出關幾處題詩仍憶君丹霞明月夢中看客裏
逢人一揮涕言翁厭世作青山嗚呼鄭老今安有千

歲一遇良亦難君不聞渭川脩竹賤如蓬不及箕簞
碧一竿色相興滅誰復數惟有此竹留人間

嘲拙翁苦吟

皺疊雙眉有底愁撚空半額又誰尤事到強求無佳
處佳處還應在不求

登滄浪亭

風塵遠處盡仙扉得地終應似此稀檻外路縈楓嶽
去籬前水引玉屏歸空洲日轉陰晴樹古壁雲沉薜
荔衣見說曲潭添一架定教漁釣不爭磯

劉伯自清道陞資以紅帶寄贈

一帶十年還自珍
白頭人贈白頭人
莫嫌故樣非新
樣交義方從故處新

戲書花山女詩卷

芳愁黯黯曉衾知
鳥道連天月一眉
鸚鵡籠寒無夢
寐聲聲念得主人詩

李判書士受寄示梅花軸時余有北關之行聊
和一首仍以爲別

庚辰

過臘梅花不到詩
誦君佳句覺吾衰
冰霜歷盡餘香在
須折瓊枝寄所思

安邊東軒次壁上清陰韻

置散元知乃分宜衰慵不合近
龍墀故林猿鶴休

相恠為見名山住少時
楓岳距府宿
眷故云爾

遊南川松亭

澗木脩脩遠籟鳴野亭渾似卧風搥詩書未了安邊
策章緩猶存補外名骨瘦漸知金帶重心衰羸得鏡

毛明
聖恩尚借求仙便不惜分符再鶴城
蔚山安
邊皆號

城

駕鶴樓次壁上圃隱韻

文書捲盡悄高樓自有孤琴伴客留落照無邊諸嶺
皎平林不斷一江流籃輿小出猶爭日楓嶽奇遊肯

待秋華髮銅章非少計
滁州歸路便言休

四月已永入金剛至南山驛
秣馬謹次先集韻
鵬圖不逐鴈南賓
擊水搏風會有辰
祗為心期存海嶽
誰將景物較秋春
投還州綏身無累
料理山資事却新
蓬島群仙遙見待
小竈何得更留人

宿高山村次拙翁言志韻

謀身謀世太踈踈
垂老兼無一技餘
千里海山窮跋涉
百年榮辱閱乘除
深慚永叔終歸潁
頗恠康侯不入廬
惟有此翁知此意
客窓孤燭兩襟虛

曉過鐵嶺用東岳韻

虎未出林龍在潭
峒天靈氣積風嵐
踈踈星斗三京北
歷歷川原六鎮南
平處逢陂元至理
高方思懼儘名談
從茲一路連楓嶽
定宿花川第幾庵

花川途中用澤堂韻簡淮陽守俞繼之

彥述

馬僕崎嶇入峽時
出林山日欲西移
禽聲下上如相逐
雲彩東南稍見奇
三宿有緣差可了
九還無術莫言遲
早知山簡風流甚
肯惜蒲團一會期

長安寺初見金剛數峯用農巖韻

馬頭青嶂即禪扉
雲檻峯嶢霽晚暉
驚世高名間已慣
入山初景見應稀
千潭水暖龍方起
古壁松深鶴

未歸惜得僧筇成緩步木蓮花下露沾衣

坐明鏡臺窺玉鏡潭拈韻

壁老諸天近潭虛萬嶂來輝輝先受日颯颯欲聞雷
漢帝金莖直秦娥玉鏡開振衣無濯足何所得纖埃

鳴淵

鳴淵水急吼如雷多少游魚去却迴試看禪翁飛劍
處黑雲長鎮伏魔臺

宿表訓寺贈載森長老用簡易韻

早識金剛冠我鮮半生塵壁歎匏懸餘閒偶借鳴琴
後勝賞終酬隱几前雲出中峯常帶雨僧將老栢不

知年懶殘相命無多法勇退人中便有仙

森少從三
淵遊頗曉

法相

登天逸臺觀衆香山盧諸峯有作

臺前萬二千奇峯臺上六十三老翁少小知名老大
逢丹霞明月似夢中耳邊初聞正陽鐘自嗟顏鬢非
春風坐須隱几行扶筇安得奮身追飛鴻青天蹋盡
金芙蓉採擷瑤草招秦童衆香仙府氣重重三清幢
節遙相通獨立山盧衆嶽宗暮朝雲彩常玲瓏老夫
於此不敢慵騁目頗驚真宰功潦倒幾年大家慵
陶隱

居以老而不休
者為大家慵奴

今日乃得御李公世人愛桃不愛松

至人守白不守紅蒼癯秀峭是真容繪色何用着丹
楓乃知玄默道所從謹呼呌竒情易窮海上仙石去
無蹤誰將一曲聲枯桐

正陽寺拈遙字

肩輿不道上方遙坐處群峯霽絳霄村遠魚鰕寧怕
釣山深麋鹿不驚樵日邊雲靄光無定磬裏星河影
共搖來徑回看雲樹遍恍疑身在武陵橋

登歇惺樓用三淵韻又簡繼之

樓頭一揖俗心空今日親熏石丈風真格我惟觀素
質色塵人自戀丹楓孤雲不歇岫盧北衆水皆從隱

窅東下界寥寥煙火隔此時此意與誰同

還宿表訓懃白華菴三淵讀書處也

古寺門常閉空階長碧蘿江山片月在今古幾人過
身計茶蕪藥時憂嘯也歌白華攀不得秋思為誰多
入萬瀑洞觀九潭以行到水窮處坐看雲起時
為韻賦長句一首

山鳥未起澗魚行客子入林肩輿鳴小僧粲然九潭
到蓬萊石上松風掃水形因石石戴水卑高渟瀉如
或使異形竒文出不窮仰視白日行蒼穹龍拏鶴巢
俱有處峭壁如聞天上語松根試作佛子坐萬境歸

病還忘我歇惺前峯入平着始信遊筇出雲端普德
危磴高壓雲浮薨飛柱離人群趣事須從昭曠起險
中殊非君子履海上輕舸當及時擊磬嗔我歸來遲

摩訶衍溪上遇桂樹有吟

塵中有居士山裏有桂樹洛陽幾時空相憶蓬壺千
里忽相遇前者山人招我隱書中嗔我來何暮耳言
夫子同心期白首可以相伴住今日相逢奈樂何還
嗟鬚鬢已成素攀枝悵望未言歸春露漙漙盈衣屨
妙吉祥觀懶翁畫如來石真

自愛青山坐結跏不知霜露入袈裟蒼苔古道無人

臨開落梅檀一樹花

榆岵石上題

千佛東徂樂未迴
榆林方丈漢時開
金杯道是天家出
繡障施從地主來
見在未來言亦妄
非今自古事堪哀
清泉白石元同趣
到處停藂興不裁

曉登佛頂臺

人言佛頂竒觀多
我登佛頂愁奈何
天地失圓方白日
不光華但見雲霧中
盪磨龍盤鯨噴相
騰拏地維騷動如
風舸浮青流白生
濤波海上竒峯隱
不出木魅水魑潛
相過前境茫茫來
徑迷自疑身泛銀
漢槎

安得雄劍抉氛陰快覩萬物無一遮

下佛頂行苦霧中探風穴鶴巢五松其險如蜀
道至松林始得蹊徑喜述

可說三臺險松林似野中高僧名妙坦幽徑入圓通
石瘦藏神井松貞立懶翁船潭題字處却在暮雲東

榆岫船潭有青石戴一小松奇甚余
題名其上傍書石瘦松貞締為此

百川橋馬僕見待送肩輿僧還松林

馬僕依依立路歧海山斜日滿檐帷停鞭更向歸僧
語楓葉丹時是後期

至九龍淵洞口同行欲占易以決行止余曰不

疑何卜君子居易以俟命小人行險以徼幸遂
不果入

君不見九龍淵中九龍迴挾石吐雲青天雷又不見
九龍洞中虎豹過白日颯颯風飛沙驚湍怒沫走霹
靂礧崖落石三千尺猿鳥無聲魍魎啼畏道懸空不
可梯往往夸夫浪子重目輕性命鐵索相牽扶服窮
絕境上有愁雲伏雨之長天下有衝波倒壑之奔川
心寒魄慄不敢窺以手拊膺空嗟咨君不聞韓公痛
哭華山嶢又不聞王陽回車太行道前者何怯後何
夸君子履之當如何好勇不必捋虎鬚好奇不必摘

龍珠我車旣安我馬馴舉足四隅無荊榛我行平生
無別岐嗟吾舍此將何之寄語遊人早歸歟莫使後
人以汝為前車

始泛舟三日浦用老杜白沙渡韻

僕夫自知津休馬青松岸出峽始登舟意欲衝河漢
鳴鷗拂客衣分帶夕陽半白衲解搖櫓何用黃帽叟
四仙空有亭丹書亦已漫嬋娟六六峯隨舟屢合散
洞簫倚清歌步虛以為亂惆悵竟何有臨風發長歎
高城東巖觀日出起而拜之仍書其石曰拜日
巖次李白懷仙歌

啓明飛天日去海群陰辟易光在在天下文明物始
覩邇者就之遠者待堯舜之事信可驚李白酒徒徒
自輕湯盤九言君不聞請看白日昇天行
堯舜之事不足驚自餘囂囂直可輕懷仙歌語反其意以堯舜盛德光輝狀出日

誦李白白雲歌仍和之

日邊長安見五雲五雲多處拜
明君拜明君君在紫宮裏
願言乘舟渡漢水青琅玕雜珮衣未獻
君王吾未歸

海山亭

盛名能不負吾見海山亭偏側如池沼
周遭當戶檻

乘桴秋鬢白拉笏暮雲青惟有莪洋曲自彈還自聽
和前述夢作

余十年前夢浮海觀金剛山如鏤玉妍妙固
有之竊意金剛雄秀當不止此也今到高城
聞海中有所謂小金剛者用小舟縈迴其下
果夢中見也

輕舟百轉逐峯迴玉笋千尋鏡面開白髮重遊吾未
信夢中能復幾回來

叢石

異態竒文鬼亦懽浪頭高峙不相降羲文取象稜皆

六翁仲傳神立每雙載白玉樓須賜帶揀歸銀漢合
成砧風霜萬古無凋歇定激人間志士腔

鶴浦元帥臺登眺

臺隍連朔氣元帥舊橫戈射虎餘疑石沉龍有靜波
烟生鹽戶小日照賈帆多晚興須無賴時教紅拂歌

沙峯

積素疑新雪微陰借遠松隨風忽飛去着處又成峯
大瀛臺觀海用范希文觀潮十韻

遵海行三日至霜林上遷縱目四顧曠然自
失乃知往者皆難為水也遂書所坐石曰大

瀛臺歸而刻焉

坤三坎中變天一水先生善畜才能濶平施器不盈
沖融浮地勢吐納驗潮聲鼓浪神鵬化占風巨鷁行
天垂將恐浸河動不成橫蛟鱷通生活烏蟾遍送迎
求仙計亦妄瘳疾語堪驚敢逐宣桴遠長懷禹跡平
固邦功孰競興寶刹難并觀止寧無記鐫崖錫雋名
雪峯寺送拙翁入洛

遠雲疎客抱秋寺屬新晴一澗穿松翠千林落磬聲
鬢添關外白歌引郢中清長道須加飭音書數寄情

戲次金副學稚明贈妓韻

府妓錦梅者即稚明所愛也

飄花浪蝶任浮沉共是風前不住心蘆嶺以南鐵嶺

北夢魂能有幾回尋

惟明方在長城謫中

金孺文與其弟禮仲

和澤

自象山來會仍携舍

弟登樓而余獨畏風閉戶悄然有吟

甲申

前江綠漲前宵雨幾處寒蓬幾首詩莫笑病翁深閉
戶小車行止自知時

疊前韻

可笑此翁衰甚矣三登仙閣不吟詩今朝試拂塵埃
硯正是高朋命駕時

疊前韻奉寄仙樓二詞伯求和

遠客耽遊不卜日老夫敗興獨題詩風聲波湧登舟處雨色雲霾落火時

是夜欲觀落火戲風雨不果

登降仙樓拈唐人韻

樓閣自今古神仙髮已華群峯連楚望一水轉巴涯
橋影吞蛟窟村圍入鴈沙輕舟欲遠放何許葛洪家
新晴登樓

連旬積雨斷人烟樓榭新晴隱几前天放光華還日
月地分濃秀與山川鄉愁楓檻間初鴈歸思蘋洲閣
小船獨有琴姬能解意却翻招隱入朱絃

儒武試藝日設宴于降仙樓吟奉席上諸君要

和

巫峯神秀自天開
產得英豪幾箇來
但恐栽培無古法
莫言選士乏良材

夜坐和申生成玉

城韻

樹影離離月上樓
燈前華髮盡吾儔
題詩共說他鄉恨
遇境空懷少日遊
竹石交情真澹泊
鳬鷗身計本沉浮
一官三黜焉知福
明發從君理釣舟

余十年中三拜成都

又三罷原詩以爲奇事故云

登黃州竹樓

萍蹤七載信浮緣
敢道行藏似昔賢
試上名樓聊騁

目炯雲竹樹更依然余自戊寅至今七年之中南貶
蔚州東謫鐵原北出安邊西守
成都殆不能一日安於朝今過黃岡登竹樓讀壁
上王元之記文有感於篇末語戲題一詩示太守閱
之興

金知事 鎮東 輓 乙酉

一德冲謙五福全
久知詩禮是家傳
熊幡幾就專城養
鶴髮相輝重
耆筵耆爵自來耕
鑿地淳風如坐皞
熙年偷然一枕聊
觀化雲盡遙空月
印川

次郭負外子施 聖濟 見寄韻

海外或傳坡老死
人間吾見桂泉詩
朝咄暮笑浮生事
莫遣西湖白鳥知
嘗於
臣以
已故
聞上
句聊
與為
戲耳

蓋自戊戌月波游後四十七年之間存歿忽忽
實有疑夢疑真者子施覽此亦必愀然作懷也

次金都正劉伯壽席韻

剛伯時在安山庄舍設宴

玉音頻叩野翁年令子承

綸下

九天公讌初擎

萬壽爵

君羹已遍一重筵時平樵牧青山裏歲暮

笙歌白髮前擊壤未應知帝力溪堂須揭福榮篇

野筵

重曰一

上元日獨吟

丙戌

瘦策亭亭一鶴前風歆白氎雪渾顛遊人踏盡橋頭

月月 在欄干更皎然

贈金生河壽

余覽陶湖金公

鼎亨

遺事其雪中獲生芥以

養病毋與王祥孟宗事甚類苟非居家至行
素有以孚格神明者其應豈若是捷也敬歎
之不足用卷中韻贈河壽河壽公孫也

孝到神明格方為能事親冬菰與笋鯉千載只三人

權處士

揆輓

崇阿叢桂老雲烟玄草寥寥七十年可耐寒旌書處

士門生挽送白鷗前

墓在三日
浦西岸云

次有衡詠鶴

野雀山鷄競後前西風吹熟稻梁天憐渠獨作滄洲

夢松籟颼颼月滿川

滄洲或作孤山

李侍郎原明以詩求鶴以一鶴撤贈和其韻並寄

居士好觀鶴有似王猷竹偃蹇庭園內雙雙不數隻
有客歲下來一顧已動色君是守玄翁胡乃知吾白
鵝以黃庭換鵬用白壁易古人亦聊爾乃心在空廓
矧茲瓊玖贈清真故無敵籠寄崑崙去歲暮意幽獨
余以鶴贈原明來使步鶴至白岳十里少縱則
鞭其脰幾至中斃原明怒撻其人又有詩報信
聊爾和寄

喜君嶽下居繞戶惟松竹為人自無雙養鶴亦一隻
人或愛能舞對影呈態色君應愛獨立霜毛映月白
蒼癯脰三尺矢不毀玉易狂奴捷亦可為爾謝寥廓
所悲雲霄物人間結怨敵奇事可激俗肯使淳于獨
戲題次兜輩韻

小窓朝雨霽黃梅老子癯顏帶笑開團飯本為招鶴
計白鵝蒼狗一時來

用金生河壽軸中韻送其省親之行

容易書齋別知君有老親前期踏青夕炊黍待歸人

金生以今年踏青日來住書
堂故勸以來年是日還來

和金同樞劉伯寄示韻

方丈珍羞落箸空，羨君兜齒似吾童。

余九歲丙戌始
齒翁則今年丙

戌改齒前書小兒老
翁之稱不亦宜乎

菜根咬得煩辛苦，始覺真成七十翁。

十翁

其二

散髮西風放嘯歌，枯齧兀兀見新牙。
丁寧養取華池水，莫遣嬌娥枉擲梭。

次人寄詩賀致政 丁亥

衰慵分作退休臣，敢道行藏似古人。
除紙免教題姓字，賜詩留取詔朋賓。
空門有友初開社，野艇無人

更問津今日始知春意動澗魚林鳥自相親

是日立春

金士舒相國詩賀致仕奉酬

公朝獻笏及殘齡郭外新謀一草亭門客緘箋投藝苑隣生問字到苔庭瑤琴三弄餘高調鐵硯千磨只舊形吾識相君其有思西湖漁唱入幽聽

金相時在西湖

次俞四宰良甫賀致仕韻

取基

風埃渾變鏡中毛漏盡天衢睡未牢七十引經宜賤分九重頒誥愧恩褒散樗應以非材老拙局惟知不著高自古金門客大隱江湖何必羨吾曹

來詩有懸

車暮境真堪羨之語結答其意

初夏乙未同尹知樞李章俞四宰良甫尹吏部
景孺集鄭判敦寧陽來宅李章具酒饌主人翁
繼之竟夕極歡而罷五老皆耆社中人而適符
睢陽故事李章用杜祁公當日韻屬諸公和之
時平耆德得優閒自喜殘年已掛冠天放奎精還几
席雲開峯色與盤桓劇知鬢髮非春事祇為心期在
歲寒未必睢陽專勝會新詩留遣後人看

有懷鑑湖香山吟成一詩

賀季真以太子賓客致仕白樂天以刑部尚
書致仕今余謝事時其官名偶與二老相符

或稱竒事然鑑湖香山優游終老之樂乃余
之所歆艷而不能得者聊吟一詩以自嘲因
用自解

太子賀賓客刑部白尚書宦成知所止清風邁二疏
今我謝事去官名偶相如緬懷高隱處悵望千載餘
鏡湖可樂飢黃冠混釣漁香山真福地九老聯簪裾
人境得相遭歸事亮不虛得歸無歸處前修應笑余
意適萬事乏何所非樂且懷我蜀肆隱何必巖林居
自嘲還自解甚矣迂且踈

奉詔鄭尚書陽來賀致政韻

江海何曾少隻鳥披肝一奏
玉音俞行藏弗惑寧
須卜進退皆憂未始殊野服
商量閒制作園居料理
小規模朝中僚友續相賀詩句真供晚境娛

榮老堂八景次兜革韻

雲出吾猶卧吾應懶於雲莫放出山去山外是塵氛
右南嶽朝雲

北山高入斗向暮先被雪夜久萬影息明河通皎潔
右北山暮雪

清風起處起颼颼西掖松隱几聽未足悠然拄一節
右西苑風松

新露灑幽圃粲粲開寒菊采之欲誰贈知音應我獨

右東圃露菊

古壇自天籟知是梧桐雨誰能瀉琴操蕭疎秋鬢暮

右梧壇聽雨

小窓忽橫枝欄角來新月清和一夜氣養得幾花發

右梅窓邀月

小池觀生理有荷復有魚添水不投釣主人恩不疎

右荷池養魚

居士欲歸山金龜買二鶴呼來竹間舞雪羽檻前落

右竹欄調鶴



雷淵集卷之七

雷淵集卷之八目錄

詩

金副學稚明輓

朴知事

致和

輓

次鄭副學大受

存謙

賀致仕韻

公佐獻詩賀致仕和其一首

哭蒼麓金老

生朝感吟

次李伯訥

敏輔

志喜詩

題李判書士謙

益輔

史記卷尾

和李尚州伯訥賀致政韻

和洪承旨養之賦玉學

和洪養之賀致政韻

次松京留守元子靜

仁孫

賀致政韻

和李弟汝翼

輔天

用靖節游斜川詩見寄之韻

用五老書瀍洛五詩韻簡諸公求和

沽得村醪數杯以替耆筵微醺有吟

李侍郎深遠

惟秀

池榭小集主人有詩奉酬

伯訥用二律記遊事奉和其首韻一首

題李侍郎深遠東山詩軸

孺文草堂小飲孺文追和杜樊川韻見寄奉酬
九月十三日 聖節入侍德游堂應製十韻
深遠池亭賞楓燕飲至夜既罷有吟示深遠
送別燕京副使洪養之

枕梅發花甚善邀仲固光瑞深遠飲酒屬深遠
間趙尚書光瑞江上詩喜而和之

龍門樵夫來獻一詩遂次其韻又令和之八首
鄭侍郎大受來過用紫陽韻見屬和之

移居南村次俞上舍汝成

漢吳

見屬韻

硯翁自蓮城見過言將遊四郡次三淵韻為別

俞君携酒來飲金生

履中

亦至拈三淵韻

硯翁乞題其畫像余為寫十四字

硯翁嫌其已簡又書請益戲添十四字

俞君汝成晤言永夕以二詩見贈和二首

金孺文俞汝成見枉拈韻

與孺文汝成李晦之

奎亮

公佐小飲拈韻

諸賢不枉中秋之期明朝各出一詩和之

俞上舍汝成見貺一大寶用二詩拜嘉

初度日汝成諸君皆有詩和之

上元之夜金孺文李晦之吳文卿來訪占韻

金光仲虛以二詩追賀余致政和其一為謝

次樂僉李仲玉圭輔見寄韻

秋日訪鄭第君範園居次其韻

詩賀趙尚書光瑞致政三首

和寒泉李公韻寄題詠歸亭

感吟

送李生彙杉歸鏡城二首

觀城李生德符以其詩軸求余屬和二首

麟孫為我辰具小酌至夜酒罷有衡獻詩和之

和李仲固用金光仲韻賀余致政

元宵步月前橋次有衡韻

又用去年元宵韻

燈夕和諸少年詠彩燈

蒼谷僑居飲汝成酒仍和其詩

謝李仲固携酒枉僑止

悶旱次兜輩韻

喜雨用前韻

厖兜與有衡步月吟詩和之

追和健菴金領府回甲壽筵韻

龜山李使君正模携酒來別醉後有贈

李倅問治郡之道又書以贈

南至後一日厖兒始加元服喜次俞汝成賀詩

追次隱菴李尚書

光廸

回榜宴韻

應製耆社自述詩

厖兒迎相之日次有衡韻寫喜

敬次文憲公龜山選勝亭板上韻寄李使君

用兒輩韻送祥原南生星老還故林

安士定

初

輓二首

絕筆三首

雜詩

秋月何皎皎四首

宮怨二首

相逢行

烏夜啼

北風行

白馬篇

戰城南

發白馬

折楊柳

臨江節士歌

雉朝飛

巫山高

君馬黃

從軍行

求仙謠

寄衣曲

宮中行樂詞

同伯氏會伯玉巖亭賦梅花小令

酒闌又出小令同賦

用白雪樓分韻余得樓字

十灘丈小屏畫淵明歸去來辭賦浣溪沙二疊
觀鄭元伯畫山水五疊各題小詞

夢作

題古畫

鄭謙齋元伯為人畫湖南莊居余為小河圖格
夜間鄰歌倚其聲戲為新詞三闋

題薇陰李處士卷首

舟中見硯翁夢瀛記有述

戲占玉連環體書文遠東湖草堂

疎慵堂小集又為玉連環體贈諸君要和

隱體貽劉伯文遠二首

宜叔見過同伯氏聯句用谿谷韻

白沙書院同伯氏文遠宗之聯句

同伯氏文遠友堂聯句用刻燭故令

太廟直廬與孺文公弼賦得荷花聯句

同宜叔伯玉大卿鐘巖宵集步杜詩為聯句

偕居鐘巖公弼寄詩來與拙翁聯句答之

芝山老人閒居耕圃賦歸田之什六篇以遺之

金生允謙扇畫題

樵人獲子鹿以獻放之南林用蘇州獲子鹿韻

泉水歌

書濟州新牧韓大叔

億增

扇為別

親享

永禧殿賜群臣宴

景賢堂恭和

聖製

次退之剝啄行

恭和

聖製耆老宴

賜詩

恭和

聖製養老禮詩

倣桂不如真竹六首示俞生

笑嶺望海示曹生

圍碁戲吟

戲竹一首贈宜叔

叢玉川

簡寄鏡城謫尉金光仲

金應教光仲寄示北關詩兼和六言又書二首

雷淵集卷之八

詩

金副學稚明輓

時憂難了蓋棺前白髮渾頭未自憐
風雨曉鷄鳴獨苦洞庭寒葉落誰邊
清名半是長沙日愧事真無康節年
抱得瑤琴人不見三清流水月孤懸

康節病中詩云客問

年幾何六十有七歲俯仰天地間浩賦獨無愧公年適與康節同故第六云

朴知事

致和輓

一節三朝雪滿顛寸心惟有聖君憐
貞標不改千磨後古貌如着百劫前
崇秩自来相忘地遐壽恰

過不期年

明時耆德今餘幾題送虞章更悵然

公嘗

言少時不以八旬自期今迫九臺云故第六及

次鄭副學大受

存謙

賀致仕韻

黃槐落盡雪飄扃獨也寒松不已青
退驪應無殘豆戀倦禽何擇茂林停
衰軀尚備鄉三老拙業猶存子一經
拱北此心兼喜懼偷閒未敢問郊亭

公佐獻詩賀致仕和其一首

塵累追商出處間前脩遐躅詎敢攀
進慚毫補空成老退涉身謀只愛閒
席尹無功圖洛社歐公好事賦廬山
雲蘿不礙朝天夢時逐鐘聲到曉班

余致政初朝中諸公

多以詩相賀翌年用上
命書形耆帖故五六云

哭蒼麓金老

月露生涯老更奇市塵曾不着鬚眉可憐到死猶詩

癖自乞雷翁相締詞

金老時模間巷入也能詩愛山水常出入門下將終謂其子曰

汝欲享葬我乎但得雷淵公一首詩以先喪車足矣其言絕奇且悲下句蓋記宗也

生朝感吟

孤露生朝只作悲老妻相勸輒傾卮分甘絕少今無
地齋餉靈幃知不知

次李伯訥

敏輔

志喜詩

仁廟戊子靜觀李文貞公以白雪樓詩魁進士至

今年三戊子公之嗣孫太源以河出圖賦為

壯元太源伯訥子也

戊子

章甫初程上舍尊雪樓旗鼓動詞垣 崇禎餘歲三

回戊太極玄孫又舉元詩廢騷興衰世歎槐評杏揖

古風存小成詎了君家事須把遺經葆故門

近年科舉專以

賦取士故詩家子孫多去故趨時詩道幾廢此亦衰世事也心常慨然第五及之○杏壇之揖繞回槐市之評旋起即司馬榜會序中語

題李判書士謙

益輔

史記卷尾

士謙嘗以新裝史記求余題目老病經年今

始踐諾而士謙奄作九原人矣感深存歿淚

隨筆滋遂書卷尾歸其孤

題罷欲詒誰寂寞投筵几遠哉老夫心歸問延陵李
和李尚州伯訥賀致政韻

自笑踈迂遠世情謝官非是要虛名天機慣向閒中
見身計多從澹處成日興只消無事飲秋懷聊寫不
平鳴古今相照心期在漫繞東籬嗅晚英

和洪承旨養之賦玉斚

玉斚文憲公舊盃也重
陽諸友來飲仍賦之

玉斚傳家二百年幾回先輩菊花天祗今斟酌悲歡
事一點終南對醉眠

和洪養之賀致政韻

古者事君三十年行休筮定出身前逢時神鳳其來
否去日冥鴻遂杳然明哲真如朝暮遇賢愚終覺古
今懸龍鍾自此商丘木好得生成雨露天

次松京留守元子靜

仁孫

賀致政韻

己丑

寒裘渴飲樂吾天百擔擗人一懶仙自昔崇華元不
分到衰休退豈為賢詩情晚晚桑榆日酒力調停藥
餌年頗喜舊游時枉駕却回蒲薦作文筵

薛文清謝事家居常

設蒲薦或笑其太儉薛曰老夫坐則為蒲薦貴客坐則為錦筵何奢與儉之足問

和李弟汝翼

輔天

用靖節遊斜川詩見寄之韻

獻笏既三載我馬當歸休

天顏非宿昔未敢懷遠

遊昨也陪 公讌九爵擎黃流暮歸有餘醺浩蕩夢
江鷗矐言栗里子幽棲同某丘楔事追前修選日命
朋儔濁醪示真率清詩恣獻酬飛翰入城裏頗憶此
翁不一詠一惆悵重我離居憂開歲倘茲遊膏秣願
相求

用五老書瀛洛五詩韻簡諸公求和

燕處安閒白日遲松姿雪鬢盡中稀祇應憂國心難
了時見秋天一鶚飛

右康節韻屬鄭判敦寧陽來

桑柘陰陰覆綠溪山罇酒熟到門時歸裝貯得天

書在蓬戶祥光野老知

右紫陽韻屬尹三宰李章

賜鴈登門蚤宴開
兜孫彩舞屢徘徊
三星圖裏行香去
五老峯前放杖來

右紫陽韻屬安京尹性之

允行

韶顏皓髮尚精神
康濟何曾止一身
垂老江湖頻悵望
早知夫子志君民

右伊川韻屬尹尚書景孺

試向江村借釣蓑
免教鷗鷺更誰何
青雲踏罷歸來晚
自笑襟前白髮多

右紫陽韻 自吟

沽得村醪數杯以替耆筵微醺有吟

間諸耆老以 朝命家家開筵受爵余貧無
具沽得村醪數盃令一子一孫一女一婦各
獻一酌

青雲岐路遊初倦白髮光陰得更多稚子也應知帝
力自斟春酒勸翁歌

李侍郎深遠

惟秀

池榭同趙尚書光瑞

敬

李知

州伯訥宋侍讀子中

載經

小集主人有詩奉酬

鳴鹿呦呦亦好音故人呼我駱山陰全家鷄犬丹砂

氣半辟詩書白日臨飲酒孰非憂樂地省雲須識卷
舒心直愁爛漫易衰歇笑指崖楓留一斟

伯訥用二律記遊事老倦吟詠奉和其首韻一首

谷鳥下幽徑肩輿來處高池清寫素髮霽色散青臯
酒事吾真老詩情子自豪東南賓主席未害顧生遭
顧愷之少時聞王謝燕集輒橐筆隨之役旁摹寫其
酣飲歌呼狀逼真座中頗苦之顧好之弗倦率以是
大名

題李侍郎深遠東山詩軸

長安道上何沾巾古時道行今時人不知早暮車馬

喧雨作泥芳風為塵居士小車長倚壁門前一道草
如苜今辰手把東山書興在李卿池園中園有青松
下白鹿斐然吾黨亦斯容行兩頓晴消酒天高霞欲
滴題詩石不為君子美無度皓首誰與一嘉客

孺文章堂小飲金禮仲元博

茂澤

李最之李良

亦至孺文追和杜樊川韻見寄奉酬

賓鴻片片負霜飛退士紫荊世事微白髮相看多後
進青山幾處送先歸菊寒似欲爭秋氣葵老猶知愛
晚暉自昔南村可最夕向來吾已解朝衣

纔開尹三宰季章幽

問故第
四云

九月十三日 聖節入侍德游堂應製十韻排

律

百第穰穰湊大東 三宮佳氣屬 流虹老人已見
秋分後瑞莢方抽九月中 黼宸如山雲彩動衣冠
就日珮聲同 王心自有明神格化道元從壽域通
天放秀毫添 八彩人歌 至德待三萬叨陪日月
光華地默識 宗祊啓佑功周辟祈年聞械撲軒皇
問道笑崆峒瞻旒昨日欣 無疾受稼今朝樂有豐
十二日 上詣景福宮試士
翌日 親受黍稷于崇政殿 苑菊示知華 聖節鑪
香翻欲送熏風微蹤幸厠耆臣列恭和 璇題激寸

哀

深遠池亭賞楓同尹三宰景孺李承旨仲固得

培趙尚書光瑞宋校理子中金應教伯愚尚默

尹副學伯常著東燕飲至夜既罷有吟示深遠

客倚霜楓庠踏苔晴暉灩灩送行盃顧生未必知秋

興收拾瓊函八首來深遠欲令畫師
模游事故云

送別燕京副使洪養之

踈踈霜鬢澹澹庖裘暮俱非遠別時漢日舊懸箕子
國胡山今繞伯夷祠秋聲漸瀝猶堪喜天意蒼茫未
敢窺莫恠離筵太惆悵老夫端不女兒悲

枕梅發花甚善邀仲固光瑞深遠飲酒屬深遠
漢祖得陳平先賞魏無知花底一杯酒勸君君莫辭
益梅本自深遠所移來

聞趙尚書光瑞江上詩喜而和之

巨艦倚江岸不愁風浪多可笑鷓鴣計所安惟一柯
龍門樵夫來獻一詩曰今日始觀海十年空在
山明朝上峽意且輸孤鳥還頗有思致遂次其
韻又令和之

落葉有微徑樵夫時下山偶過雷淵室懸燈宿不還

其二

能詩又能酒何以老空山挽衣上酒席回首孤雲還

其三

月溪一樵艇龍門落木山誰憐湍蕞雪平野望煙還

其四

酒席樵歌動儂家本在山何時茅屋雪見汝伐木還

其五

我自愛樵夫樵夫知好山何山可結社歲暮吾當還

其六

侍郎飛清翰言汝在東山是日梅花動如待詩人還

其七

老夫休官去東林買碧山有能南北陌不用一錢還
其八

歎息褐衣子胡為浪出山世不談王道惟應一笑還

揚子雲曰古者士不
談王道樵夫笑之

鄭侍郎大受來過用紫陽韻見屬和之

庚寅

乍喜緋袍暎綠蓑莫言京洛事如何今朝植杖南臯
下芳草未長花欲多

移居南村次俞上舍汝成

僕吳

見屬韻

有酒相晨夕南村古事存忘形誰主客樂志是田園
白雪難為曲玄心不在言從君丐餘照輝得半窓昏

硯翁自蓮城見過言將遊四郡共次三淵韻為別

垂老離群各損神
風花歲歲自為辰
誰知南郭提壺客
却是前宵入夢人
瘦骨相憐仍把臂
童顛可笑更俄巾
憑君問訊龜峯石
淵月心期萬古新

記昔甲寅與月谷遊

龜潭掃石題淵月二字不知苔心墨痕尚有可尋否也

俞君携酒來飲金生履中亦至拈三淵韻

僑居亦峙書三架
病肺猶堪酒一巡
何事南村多日月
白頭難得素心人

硯翁乞題其畫像余為寫十四字復書曰公之

平生在此添一字則蛇足矣

可之穹眉故能詩穀也豐下宜有子

硯翁嫌其已簡又書請益戲添十四字

畫蛇添足亦一癡相馬遺毛乃千里

俞君汝成晤言永夕明日又以二詩見贈喜而和之

小酒何能挽客歸幽人元自愛清暉雲羞鶴白睡相引柳隱鸛黃啼不稀三步故應知絕影一枝那復有雄飛踈襟莫以浮名隔今日吾還老褐衣

其二

有客騎驢過綠野山衣澹澹落青霞何堪禮數如前輩頗喜文儒出故家髮白可能玄入草夢闌無復筆生花文章不在多言語咫尺經帷是絳紗

金孺文俞汝成見枉拈韻

山翠濛濛竹語纖柴門客至自鉤簾群童風雨惟歌枕浮世陰晴祇散籤稚鶴已能高步武癯松更覺好鬚髯殘經每有優游地何獨相攜醉碧帘

與孺文汝成李晦之

奎亮

公佐小飲拈韻

柴荆有繫馬垂柳日亭亭古色苔生劒幽襟蘭在經人間吾未雨天上客為星多少行藏話秋風動夕扃

客有誦離騷
第四所以云

諸賢不枉中秋之期老夫適有採薪之憂月不
同賞酒不對飲客猶悵然主人可知明朝各出
一詩伏枕和之以遣懷

深屏垂素髮老矣不勝秋好客道然集良辰尚可酬
影分瞻月砌聲近詠詩樓笑指東籬下前期為我留
俞上舍汝成見貺一大寶文曰身如芭蕉心似
蓮華百節疏通萬竅玲瓏蓋憐我耄昏將以是
覺之也且其篆法奇古有足珍者用二詩拜嘉
蓮暈蕉榮透石腸斐然文思入雕章明珠終是無心

得試看蓬廬夜放光

其二

玄機惹郁湊文腸
虹貫星離爛作章
料得井花含覺意
老毫那復有圓光

初度日汝成諸君皆有詩和之

人皆嗟老我知閒
夢想箕山潁水間
杞菊祗堪支晚景
丹砂那得住顏顏
流年又值桑弧夕
老淚重沾木杲山
偶有小樽能醉客
揮毫燭畔未言還

上元之夜金孺文李晦之吳文卿俞汝成步屨
來訪命酒占韻聞鷄而散公佐麟耆有衡亦在

辛卯

名辰游侶盛招邀
蹋到山南第五橋
鶴鬣冲風分暝色
烏紗隨月岸晴霄
雪邊松桂成陰遍
琴裏絳絳洋與世
遙不有嘉賓誰永
夕銀河落盡一鴻
飄

金光仲

煜

以二詩追賀余致政和其一為謝

數莖霜髮可爭秋
蟬語槐涼滿古樓
放鶴山南聊遠

世待人江岸且維
舟多忘幸不先朝
賀

太中元會柳公權耄忘先

朝臣稱賀御史劾之
論者恨其不歸事

無補虛為在野憂
陋室尚須榮

老記知君筆意自清道

次樂僉李仲玉

珪輔

見寄韻

雪鬢相飄古意存東山喬木是吾村誰言薄宦難高
士人道鳴巖有好孫日赴梨衙調雅樂時過蓬戶醉
芳樽瓊投瓜報君休笑老子年來已忘言

秋日訪鄭弟君範園居次其韻

澗道霜清鴻鴈初小車穿到數村疎青山似我牆頭
見黃葉無人谷口居樂志真成垂老計忘言何用絕
交書看君自有漁樵氣始覺前宵夢不虛

結用漁樵
夢遇故事

但未知君能
抵得否也

詩賀趙尚書光瑞致政

跡歷秋華潋灩杯逢人江岸一徘徊常憂急浪難回

掉却彼天風吹送來

其二

中兵給事廟堂姿
人道三良盡白眉
正值秋風梁稻熟
冥飛一鴈又何奇

其三

未老得閒方是歸
登山臨水意無違
堪笑此翁遲見事
白頭來卧故山扉

和寒泉李公韻寄題詠歸亭

安城郡沙溪先生絃歌之鄉
而仍以俎豆焉
詠歸亭又先生之杖屨所逍遙
而尤翁記其

事至今百有餘年矣亭久荒圯古跡日泯院

儒俞洛柱等相與謀重新之權侍郎尊趙上

舍鎮寬出力鳩財以相役時則聖上四十

三年丁亥也功既訖以寒泉李公詩重揭壁

間屬不佞續和詩曰

絃誦隣書院重修有此樓薄遊曾幾日遺愛自千秋
蔽芾成陰木清冷不廢流應知詠歸興如侍冠童遊

感吟

魁顏雪鬢好心期八十光陰萬首詩我有瓊枝欲誰

贈水花歌曲祗今悲

礪翁已老未嘗一日無詩詩既成什輒走入至洛使余和之或

遇疾未酬輒被催督余以書戲之曰君詩如水我詩如花水流不渴花叢有時然不以水流根花亦無叢時君若愛花時時以竹露相澆慎勿以惡水灌來礪翁大笑又以水花歌一篇送寄礪翁葬日出此詩一感懷
諷仍書

送李生彙杉歸鏡城

余嘗表松巖李公墓矣按使為具美石碑刻焉李生彙杉松巖孫也以其大人寢郎公命裏之二千里親奉墨本以歸又以父年八十引例登聞得蒙恩授通政命誥一通於是鄰中士大夫知其事者莫不艷歎言李氏父子之孝各盡其職于其行皆有驥而余貧無

貨用二詩為贈

先執人瞻貞玉劉孝符天資壽星銜歸裝貯得陽春
氣不怕風冰透薄衫

其二

馬僕蕭蕭雪嶠巉計程何日到松巖城南老子長回
首別處亭亭一翠杉

觀城李生德符以其詩軸求余屬和蓋趙悔軒

觀彬

金退漁

鎮商

唱之而金伯春

元行

宋晦可

明錄

李子三諸君子續題者又數十篇余亦走

毫以塞請

李嘗問學於寒泉松巖之門

憐君早志學因不失其親來日寒泉墓幾番芳草春

其二

白頭心尚在夢裏拜松巖大雪北關去飄然一布衫

麟孫為我辰具小酌與金濟大

用謙

趙光瑞李

仲固金光仲元子靜李晦之俞汝成晤言至夜
酒罷有衡獻詩與弟侄輩和之

紫閣峯南一草堂閉關非為養微陽山寒不放閒飛
走園淨渾含雜色香天與我辰爰得靜心游太古故
能長惠然吾黨光初度笑傍梅花進百觴

和李仲固用金光仲韻賀余致政

老夫無興賦悲秋，梅凳經函共一樓。
天籟獨聞南郭，几風濤不及五湖舟。
籠雲已了行藏事，園鶴惟知飲啄憂。
但有賞音如數子，肯愁霜鬢歲華遒。
東坡遊華山籠白雲而歸至家，幾之籠已空矣，大笑曰：世上富貴之不足恃如是夫。

元宵步月前橋次有衡韻

壬辰

宿靄渾收踏月天，青蘼扶我一燈前。
半壺春酒不成醉，橋上相逢皆少年。

又用去年元宵韻

老人無伴倦招邀，明月相隨到此橋。
已覺清寧為福地，清寧橋名稍着氤氳霽寒霄。
風前珂珮游龍過，空外笙

歌翺鳳遙可是儂居非九陌免教梅蘂曲中飄

燈夕和諸少年詠彩燈

剪綵窮機巧千金賁一燈火圍紛射獵雲袂宛飛昇
光逼星辰動影分河漢澄鰲山留諫草今日果誰能
蒼谷僑居飲汝成酒仍和其詩

病肺雖妨酒敢孤鄉黨杯豈無青嶂色難得紫芝來
道在忘年處筵非選日開五湖多白髮相望意遼哉
謝李仲固攜酒枉僑止

使有高朋壓酒筵老夫何處不悠然南山霧豹自知
日東野雲龍渾忘年香社藏名吾豈隱毬塲駐之子

方賢擢前也是寬閒地遮莫風光近暮天

悶旱次兜輦韻

蒸仁熏義自通天雨脉應存未禱前川嶽日間牲幣
舉農夫依舊枕鋤眠

喜雨用前韻

至誠寧有未孚天向夕淋浪到曉前喜色定知添
八彩老臣今夜亦安眠

厖兒與有衡步月吟詩和之

一道青冥送遠鴻故山松桂又秋風瑤琴不是無心
語霜鬢輝輝月正中

追和健菴金領府回甲壽筵韻

健菴金相士舒號

赤舄安安花甲春白頭惟有獻

君身

李鄴侯壽日上賜上尊問

日卿欲何報對曰臣無長物惟有老身可以獻君耳上悅

家聲輝赫提衡日廟堂

雍容待漏晨在御瑟琴元靜好專城牢罕摠芳新歲寒松栢猶堪畫何獨鴟夷散髮人

龜山李使君正模携酒來別醉後有贈

老人長憶少時游送盡青山餘白頭此別可能無一醉龍門秀色夢中悠

李倅問治郡之道又書以贈

牧民寧有別般奇二祖清規爾自持世俗不知清靜

法都將公事入營為

南至後一日麗兒始加元服喜次俞汝成賀詩
稚子扶吾未覺衰賓筵把酒過三卮腫眉只愛清如
許巾服誰期儼若斯善養微陽方長氣真成老栢後
凋姿男兒生有無窮事大學元從舞勺時

追次隱巖李尚書

光迪

回榜宴韻

隱巖李尚書丙申回榜之宴 肅宗大王賜
詩以榮之一時諸公賔和者幾百篇矣其後
五十有七年而公之曾孫澤鎮以帖子見示
且要一語於戲此盛世稀覯事也可無志乎

康壽繁榮世敢希德星輝處福星歸頌花錫爵猶前

事弁卷

奎章始覺稀

是日用宋純故事命賜花宣醢故云

應製耆社自述詩

并序○癸巳

臣有客系出宜寧之南以寧考二十四年戊寅生

景廟元年辛丑選進士當宁十六年庚申親享

文廟試士而臣以縣監忝丙科戊辰先王影幘成

而以都監都廳陞通政壬申寫進懿昭世孫哀冊

進嘉善乙酉以文衡久次擢資憲丙戌以世孫德

器成就歸功於輔養之臣特加正憲丁亥以年七十

叅耆社仍乞致事蒙恩許休是年冬上幸耆社

推恩入侍耆臣而加崇政癸巳以 聖壽八旬 臨
御五十年覃 恩國老而臣加崇祿竊自惟立朝三
十餘年秩躋崇華報蔑絲毫猥沾 善養之化獲遂
投閒之願 恩造優渥稱述難罄茲敢承 命畧叙
遭遇始末系以壽域詩一章竊附風人之義詩曰
古聖營壽域版築非土木積仁為基址集義為城郭
其俗貴清靜其政去殺伐風雨不能毀災沴不能襲
臣亦化國中一民叨陪 聖主登茲域日月光華四
門闢北斗齊擎萬壽爵 宸心遇泰戒太康其何思
乎 色惕若飢者思哺寒者衣病者思醫勞者息搏

有仙漿盤有桃盞歸來兮同予樂乃知是心格皇穹
導揚和氣錫民福臣雖告老舊太史歌詠聖德乃
其職但願世世修此域萬年不騫如一日

麗兒迎相之日次有衡韻寫喜

盤幣芬芬肆一堂好風披拂畫帷長心如捧玉知佳
婦氣欲摧山笑快郎老我幾時搏有酒嘉賓終日席
留香請看園綠春陰轉返照能生薄暮光

敬次文憲公龜山選勝亭板上韻寄李使君

山水不自勝人勝名隨之斯亭得主人選勝名亦宜
山靜性自近水清政可儀人地既相遭歐滁名共垂

勝處在會心何用一尺碑

用兜革韻送祥原南生星老還故林

游學身方健飄蓬信所之千支同一本初面似前知
食淡寧彈鋏囊空獨貯詩鶯啼愁別日蟬到識歸時

安士定

初輓

研經供白日隱几送青雲雅操多因學餘華不數文
杞林甘側翅棧豆耻成群惻惻窮途泣寥寥我識君

其二

諫議聲標峻艱虞鬢髮皤虛舟何意思浮世自風波
偶抱漳濱病俄停里巷歌祖筵違伏枕老淚不禁多

絕筆

易簣前二日

早知有今日日至心不平非仕亦非隱半生無定名

又

有生孰無還君子乃不愧請將一箇安了我今日事

又

日至吾當去事了心更閒丹霞與明月寤寐寄人間

雜詩

秋月何皎皎

以下二十一〇乙未
首屬樂府

秋月何皎皎影入秋江裏歡心有如月着人如着水

其二

秋月何皎皎影入秋江濶
儂心有如水受人如受月
其三

秋月何皎皎影入秋江幽
歡心有如水不與月俱流
其四

秋月何皎皎影入秋江湄
儂心有如月水流月不移
宮怨

昭陽夜如海公讌殊未央
徘徊翳長袖零淚濕鴛鴦
簫鼓耳邊歸妾心徒悲傷
新種桃李樹決明無輝光
宮中飛燕入妾寵那得長

其二

君王宴長樂，豔我芙蓉粧。
詔賜蜀錦段，製我舞衣裳。
裙袂不及垢，卷之在筐箱。
君王終見棄，及汝委山岡。
日月若回照，以汝入昭陽。

相逢行

少年射獵恒在山，手搏猛獸皮作冠。
不肯倪首事公侯，三四十不得官。
朝過俠客飲美酒，夜宿胡姬走馬還。
道逢虬髯微服遊，立馬相看狹斜間。
天生虎頭豈長困，深知不言劍光寒。
暗將一技買人笑，仰面雙鴈落金丸。
黑雲北來日色黃，起身西望見樓蘭。
征西幕府初選將，橫鞭長揖入長安。
九重春寒賜錦袍，禿

袖短後鵬鵠盤錦袍身煖知君恩不辭關河行路難

烏夜啼

烏飛不向樂處棲每向孤妾愁中啼銷金帳底回新
夢繡窓夜和鸚鵡語手排深屏下玉階半庭梨花濕
紅雨

北風行

塞地恒多風塞天晴日少寒聲盡渤海朔氣橫燕趙
遼河以北飛塵黑長城一遶遺孤照怒飈轟如代馬
突回颶威若胡兒嘯關西老將聞起立號令諸軍戒
夜哨

白馬篇

郎騎高馬來馬高七尺強黃金飾馬鞍青絲織馬繯
繫馬樓柱與馬窺然後執鞭入中堂借問郎何愛此
馬答言西北賊壘長與我一心獨此馬誓將破賊酬
君王

戰城南

戰城南死郭西黑雲壓城集夜啼雌狐和鳴集入宮
啄人腦吞人肝帳下男子與君同命竹林幽幽血斑
斑魂飛上朝帝悲傷老將罵狗狗速殺我生有死臣
有君且不從汝為狗魂飛上朝帝悲傷天上有三星

光芒如月魑魅魍魎莫逃形走野死烏鵲來食不盡
啣飛甯木杪謂我謂烏且食盡血染草木草木且為
妖

發白馬

平明發白馬薄暮度龍庭輕生貴深入何用列堠亭
藏兵象勾陳發矢如飛星功成振旅還不勒燕然銘
折楊柳

柳絮何飄飄柳枝何依依君身似柳絮妾身如柳枝
柳絮隨風去不返柳枝長向紗窓垂春風吹南陌楊
柳碧如絲慙慙折一枝遠寄黃河湄胡虜尚未平良

雷源集
人未可歸

臨江節士歌

亭臯木葉下節士悲清秋舉目江楓暗低頭江水流
江中有巨鰲其大蔽千牛斬之當用劍射之當用弩
巨鰲未斬身已老哀哀淚如雨

雉朝飛

雉朝飛光陸離川原上草萋萋雙飛又和鳴一雄將
一雌古有牧犢子五十未娶妻感此自作歌歌聲一
何悽

巫山高

巫山高何崔崔淮水深何湯湯我欲從君東歸山無
梯川無梁我有瓊瑤一雙願以遺君佇立望君泣下
沾裳巫山高使我心傷

君馬黃

君馬黃臣馬蒼啣金羈韉玉鞭朝發扶桑夕秣玄圃
乃知臣馬良臣馬良願以獻君駕星輅載雲旂驅馳
八荒和洽諸夏天下康

從軍行

朝廷重開邊幕府簡驍雄身隸征西營手劒腰兩弓
懷竒伺一便轉戰祈連東遙識戎王旗射殺萬軍中

胡馬退如潮朔漠居然空屯師黃花營飛凱明光宮
主將儒家子頗有卻縠風記籍上軍府皆言麾下功
從戎三百人一朝拜爵同南軍聞之滋恨殺樓船公
求仙謠

青霄赤緜飛雄劍三洲出日神光豔姑射深屏雙黛
歛羲文軒軌尚不知海外秦人空汎汎喬山蓋有金
龜藏廣成不救軒轅亡古有堯舜壽百年未必求仙
獲命長求仙千古令人傷

寄衣曲

深屏寥寥撲流螢卧着牽牛織女星落葉翻風似人

來兩階蟋蟀不堪聽翠袖寒入鴛鴦澁遠憶良人戍
龍庭去歲良人寄書到為說邊城寒氣早南方霜降
北方雪良人身上無重襖官家亦自寄衣去不如妾
手裁縫好禿袖密針鳳凰絲中有寄書誰得知上章
勗君平胡虜下章道妾長相思良人有君亦如妾有
夫願君勿念閨中私

宮中行樂詞

春暉灩灩生春物上陽花枝日中出玉輦縱橫過太
液中書百官間清蹕幢蓋靡靡襲彤雲流蘇百寶龍
光溢迴廊窈窕越羅香三十六宮笙歌發蕉尾流霞

紫駝羞雕紅繡類圍清瑟隨髻鵝黃為君掃雲母深
屏貼新月外庭冠珮且坐睡內房曲讌殊未歇鴛鴦
枕暖鸚鵡語寧知嬌愛生褒姒若教行樂萬方同願
將百年為一日

同伯氏會伯玉亭賦梅花小令

以下十八首屬
詞令○丁未

梅已發簾卷翠梢斜萬里春風惟此樹一天冰雪著
孤花樽酒坐君家花下飲花落使人嗟春後豈無
花似霧興來還有酒如茶獨惜此芳華

右調望江南

酒闌又出小令同賦

野橋深雪散驢蹄水亭西是君棲漠漠煙村處處養

豚鷄見客敷腴顏色好冠白氎杖青藜
西樓宴坐
俯長堤宿雲低暝禽啼我有新詞秉燭為君題春日
相期何處好池水綠草萋萋

右調江城子

用白雪樓分韻余得樓字

飲子流霞酌唱我水調謳昔余來此菡萏花發倚高樓
尚憶清冷石上濯足疎風暖雨圓葉轉新秋今日
蒼髯客惆悵碧欄頭
曲將竟天籟靜嶺月流餘音
忽厲棲鵲驚飛撲簾鉤何處風塵儂子鼾睡九街夜
色栩栩夢王侯吾道苟如此林壑且優游

右調水調

歌頭

十灘丈小屏畫淵明歸去來辭鄭元伯所作也
以浣溪沙調為賦其二疊

宿霧蒼蒼草樹平溪南細路未分明何村老子亦孤
征欲往柴桑何處是橋邊立馬問前程回頭遙指

峽雲生

右述問征夫以前略

水鳥驚飛笑語喧僕夫迎我到山樊更看幼子候衡
門容裔扁舟春水濶依依桑柘繞山村風塵十載
返田園

右述稚子候門

觀鄭元伯畫山水五疊各題小詞

辛未

誰謂畫無聲百谷飛泉一林清磬試看缺月峯頂

其二

疎木斷岸細雨長洲
簫笠一老暝踏孤舟
爾家何在不如且歸
于以曠網于彼竹籬

其三

蒼壁下白石好古松
畔流水好一茅亭無
亦可一局有亦可

其四

大男南院釣魚去小
男西崦采藥去薄暮
歸來古渡寒煙遙村
澹樹老子窓間睡罷
攬衣獨眄興在白鷗
沙紅蓼岸

其五

誰勸汝彈琴汝莫彈琴孤舟蘆葦前獨夜徘徊鍾子
期竟不來鴻鴈歸盡後江天欲濶時小絃廉折大絃
寥朗却恐興極生悲汝莫彈琴天地是汝形骸水月
是汝肺腑汝抱汝膝冥兮窈兮又安知何者為商何
者為羽汝莫彈琴

夢作

黃鸝遊後院莫回顧回顧黃鸝亂

自評曰此蓋古歌謠體爾意不可解但作物
與我各得其所相忘而不相亂之意者語却

渾

題古畫

文遠請畫江居為賦此詞題曰題古畫蓋江山者天地間一古畫也

欲知江上秋鴈落蘆葦散欲知江上夜月小江流緩
欲知江翁濯足時江天沈沈漁歌斷

鄭謙齋元伯為人畫其湖南莊居請余題之余
為小河圖格以應之 壬申

山何幽水何澹幽者村澹澹煙初歛洲渚清鳥不
飛楊柳陰陰覆柴扉主人何事閉戶春睡抑前峯采

藥後溪觀魚或云是處士去後東鄰廬

夜聞鄰歌倚其聲戲為新詞三闋

清涼山六六峯惟有白鷗知我家白鷗清慎豈負吾
輕薄難信是桃花桃花桃花更莫出洞去恐引外客
來經過

右李退溪辭

漁父驚風波賣舟買騏驎誰知羊腸險甚於瞿塘水
從今棄舟又棄馬願從老農學耕稼

右朴思菴辭

三冬一布褐巖穴受風雪雲間一寸暉不曾晞我褐

忽聞西山白日頽自然淚落心中哀

右金河西辭

題薇陰李處士卷首

君重妙解乞詩法初不露乞詩意但取古琴彈一曲
西齋月曉人未起忽聞一泓飛泉瀉寒竹琴已竟了
無言發索出詩卷手自披展令我讀次又出元伯畫
嘉陵山水老石孤桐蘆岸漁舟使我心神超越如赴
水之鴈趨林之鹿誰能廣平石腸於此不吟詩嗒然
如枯木嗚呼君重妙解乞詩法何不移此術向人學
千祿布褐青鞋老空谷嗚呼君重之心我知之所以

一見如宿昔

舟中見硎翁夢瀛記有述

庚辰

首春硎翁在鰲山夢暨拙老覲予于瀛洲予
坐大艦取真一引滿已又飲二客火桃三侑
酒皆醉飽盡懽覺而異焉書用識之其四月
予自蓬萊遵海而東放于大瀛臺下硎翁書
若記適及舟中而拙老在焉相顧嗟異述臨

江仙一闕

海上蟠桃紅萬顆
君山美酒如泉
三生結習太狂顛
偷來鰲山下
仙吏正高眠
仙吏夢中能飲酒
霜毛

何處癯仙舉觴壽我一千年三盃猶可又追我大瀛
船

戲占玉連環體書文遠東湖草堂

以下四首屬
雜體○甲戌

魚跳鳥啁迓遊車十里青郊問索居古簷留題渾漫
稿高軒散帙半新書日華漾水春生島山氣和煙柳
拂墟丘壑幽期聊獨往生涯吾欲訪耕漁

疎慵堂小集又為玉連環體贈諸君要和

高軒歌歎盡吾曹日永山搏有獨醪三世并春連孔
陌百年襟抱寄莊濠豪鷹不受雕籠養良馬應羞弊
策操木道滄洲歸計濶古來賢達半蓬蒿

隱體貽劉伯文遠

老友安東人金履健劉伯完山人李德弘文
遠請得印章之文以金門隱體應之

夙欽謝傅名願居子產里叅三體圓方首八諧宮徵
道坦幽人貞天行君子以合德須用柔吹填和仲氏

其二

睨柱壁不碎撫琴畫有響發蹤稱蕭功齊名居杜上
潤身見睥盜任重要寬廣郁乎吾從周遠我長相望
宜叔見過同伯氏聯句用谿谷韻

以下六首屬
聯句○丙午

黃鳥吾猶卧青驢君已來

吉

我雲晴高葉動樹老晚花

開德懶拙元因性文章媿不才宜江湖堪一醉請更

具深杯吉

白沙書院同伯氏文遠宗之聯句

落花閉古院春草有殘碑宗苦節危時見英姿畫裏

知吉歸雲鐵嶺曲斜日穆陵詩千載流傳遠幽

吟不勝悲文

同伯氏文遠友堂聯句用刻燭故令

高燭暈夜長芳樽知歲晚文古甃雪覆深老葦煙生

遠吉梅寒照耿介鶴癯叅偃蹇德天機懶賦詩世事

笑噴飯吉昂垢丹不化珷登玉羞混文樂志魚脫淵

稅跡葉歸本

德

懷我理草廬樂此滋蘭畹

文

念衣桑

可樹計食田當墾

德

簞空亦樂顏途窮寧哭阮

吉

操

琴遣誰賞馴鹿待婦挽

德

孔訓貴無愠羲絲嘉肥遯

文

有斐素心人攜手當早返

吉

太廟直廬與孺文公弼賦得荷花聯句

甲寅

水花充淹留愛茲晚色淨

雷

我來五月初圓錢得已

盛

公

亭亭吐藕高蔓蔓引蒂永

孺

方沼隣

清廟托

體在幽境

公

匪嫌處泥滓所貴保清靜

雷

交加意相

因長短勢不整

孺

芳蔭尚歛滋小萼已含耿

雷

將敷

驚淺馥既綻嗟孤靚

孺

島風亞薄妍藻日疊新暎

雷

房暄安蝶翅蔭密深魚泳

公弼

受雨暖晚悴裊露儼朝

炳

文孺

池閣坐永晝虛涼稍無竟怡然愜素襟賞茲清

通性

公弼

已被君子憐寧辭君子病姿慚竹君勁色遜

鞠衣正薄耀春兮艷易謝朝菌命化功固無全永慨

發沉詠蒼松立其側使我屢引領

雷淵

同宜叔伯五大卿鐘巖宵集出杜子詠懷北征

詩讀之仍黜其複韻而步之為聯句八百五十

言
丁巳

偉哉乾坤內吾道一何拙

宜叔

讀書四十年雅志在夔

契

德戎

良驥鑒和清周道步趨濶

伯王

心究理亂細眼窮

帝霸豁

大卿

行藏各所值裘褐隨涼熱

宜叔

韞櫝玉不沽

在鑪金自烈

德裁

竒想殿埃壝遐標競雲月

伯王

逝將掇

靈芝丹丘搜寶訣

大卿

神僊竟虛無志業兩虧缺

宜叔

身

計轉濩落世故多爭奪

德裁

逃俗自高賢葆光托巖穴

伯王

巢許卧箕潁幼安泛遠渤

大卿

通達繞甲第曲徑走

交謁

宜叔

顏忸野鷗嚇志遠波鷗沒

德裁

荷製獨初衣商

謳屢擊節

伯王

希聲匪寡和識曲亮無絕

大卿

男兒重交

義意氣金石裂

宜叔

賢豪得合并襟韻迭鼓發

德裁

文章

溯灝噩理鈔析膠結

伯王

六經窺泓博百子駕截嶽

大卿

求源要中深歛華戒外滑

宜叔

典刑周藝古律呂虞球

憂德星斗紛芒角震霆或轟輶伯繪無施黼黻璞有

裏短褐大懸壁琴自響埋泉劍不出宜優游豈無所

睠顧戀京闕德嶽瀆王畿輳峙真宰活伯野策美

烟華湖舫攬雲物大遙海送自濶懸磴置脚慄宜貫

酒叩山市攜衾宿僧室德厓瀑盪煩抱攢峯竦懦質

伯兩集楓浙瀝霜繁石蕭瑟大忘形混禽魚耽白雜

楂橘宜崇墉抗雲標矗石剡秋骨德綢繆百濟故興

廢前史述伯疊磴劣通鳥窠徑難容轍大戈鋌電掣

明埤規月抱兀宜秋旻劇搖落川陸露曲折德搏單

逐幽竒驢鳴捨牽牽伯已經清潭遊復從紫溪越大

孤亭靜雲日激湍嗽霜雪

叔宜

控巖白螭癭走澗蒼鼯

渴

德

樓壓戲鯨浪潮奔駢馬卒

王伯

西眺直登萊中原

事悲咽

叔大

北控無朝廷東顧憶征伐

叔宜

哀歌寫感激

烈風來蕭屑

德

孤懷隰苓實幽事崖菊掇

王伯

開雲天

為霽餘閏辰又吉

叔大

歸墟俯咫尺浩蕩觀落日

叔宜

揚

明閔萬國駐輝覆孤革

德

蛟鰐騅爭逐霞霓護恐失

王伯

陰陽通晦明機鑄窺密勿

叔大

羲和逝將攀葵藿傾

更切

叔宜

月宿嗣瓘璿魑魍敢怵惚

德

駟隙如斯迅鷗

盟幾時畢

王伯

境近猶會心詩多豈嘔血

叔大

古鐘驗灰

劫遺塔感興滅

叔宜

衣留坐禪龕瓢泛酌泉窟

德

穹林

契寬閒苦海謝回瀟王伯郊園滌煩紆文酒續怡悅大卿

架峙鄴侯書園拾杜陵栗叔宜觀遊飫禽嶽燕息慕莊

漆戎德霰冰冽天序松篠森庭實王伯幽抱易成慨昨事

毋已末卿大遲回惜壯心晚晚撫衰髮叔宜好學閒炳燭

就道思結襪戎德騷悲屈原醒歎餘梁甫膝王伯經世願

已違垂後辭空列卿大外境捨羈絆浮念期洗擲叔宜天

人噴精微章句辭塗抹戎德嚶嚶古賢期齟齬纖兒唱

王伯道源洙泗邈利爭蠻觸聒卿大真偽楚猴冠是非齊

人說叔宜鳴梧絕威鳳清蕤憶俊鵲戎德杞癡抱憂焦片

獻怯唐突王伯歸依有廣居磋切資良匹卿大卓立企嶽

峙勇進服衆決

叔宜

遷義譬獲玉砭過當愈疾

德

安時

蟬用屈造道龍不接

王伯

勵操大冬栢障慾中流碣

大卿

觀世用舒卷屏機忘活殺

叔宜

羊鹿鳴相和室蘭臭自

別

德

屋漏臨此心籤簡儼昔哲

王伯

且排曹劉牆共造

周程闢

大卿

聖路無窮極慥慥勉日達

叔宜

偕居鐘巖公弼寄詩來與拙翁聯句答之

辛未

東山十載罷春遊

淵

今日騎牛意自悠繞徑松篁迷

舊躅

拙

滿林花鳥起新愁

淵

樵人歷歷過蒼檜

拙

酒

娼蕭蕭餘白頸醉後聞君歌伐木三章未竟涕先流

淵

芝山老人閒居耕圃犁然有樂乎心俾余形以

詩賦歸田之什六篇以遺之

以下二十四首
屬四言○丙午

逢逢白雲一北一南昔我學書韋帶青衿中年學劍
韎韋兜鈴今我來止芝山之陰

逢逢白雲一西一東昔我東征汎彼扶桑鯨波擊楫
日出其中今我來止芝山之陽

逢逢白雲在彼幽谷今我老矣云胡不樂折劍為犁
賣馬買犢載耕載耘芝山之曲

白雲三章

此章將叙歸田之意而先述出處
之由以見今之衰老非復昔日之

壯健不可
不歸田也

先民有言民生在勤工賈流易求利于人農食其食
曰惟天民今我老矣莫如歸田

我田孔良南東其疇勤力其中靡他其求維此少華
載陳農謳俾歌于畝勸我農夫

先民二章

此章承上章言務本力農之意余惟工賈遷居貨各食其力然猶

與人交易而後獲其利惟農奉天時殖天物自耕其田自食其食無求乎人而自足故曰天民為農者不可不知此余故以此章起意而備陳于下以固其歸田之意

井風解水降風解土有魚陟冰有蟄震戶我人及此
爰起我處理我鎡基將服于畝

天雷發聲湔氣時舒及我農夫出我蓬廬載糞載燒

迺畚維牟及杭備我孔無
鳴鳩拂羽戴勝在桑我稼畢藝我圃俱興襲我春服
將翺將翔農師有言今年其豐

升風三章

此章專述三
春田家之事

苑彼桑條維葉離離女子是采毋使蠶飢我蠶在箔
黃白其絲女子是績以作我衣
仲呂蕤賓風雨時和爾田若何我苗孔嘉飯我僕婢
載笠載蓑載鋤其莠立我幼禾

既炊我麥亦羹我葵群饁于野其甘如飴我麥幾何
三釜有餘秋穫弗遠庶其繼之

桑條三章

此章述三夏田家之事養
蚕亦田家要務故併言之

苑彼嘉木其實童童我兕剝之我承以筐我筐既盈
納我懷中我實孔多我稼其同

女兮秉鎌男兮滌塲偕適于野我禾穰穰既獲既束
載剝載揚甕盎受之塞戶乃藏

我有餘粟可以為酒我有旨酒與汝樂胥農夫醉飽
起為我壽汝年九十汝家寔富

嘉木三章

此章述三秋田家之事種
樹亦田家一事故係于此

我田既收稗稂多有載編載絢葺我室堵雖有陰雨
我室靡漏凡我契活畢自南畝

彼隰有薪山有朽拙載掇載暴煖我土埃捉衾熟睡
舒我之膝有風自北滂滂下雪

我田二章

此章述三冬田家之事冬則農功既訖民事有閒葺屋採薪之事皆可述也情於農者不得有此樂余以此章係之田家之事者亦將以勉翁云爾

歸田之什六篇十六章

金生允謙扇畫題

我驢既并曰女揚櫓揚櫓悠悠此山之陽有松有石
君子夷猶

樵人獲子鹿以獻放之南林用蘇州虞獲子鹿

韻

癸丑

歸女于麋

水草交處曰麋

窈彼南陬或寢在阿或飲清流爾

友孔邠和鳴呦呦樂爾深居慎爾出游

泉水歌

壬戌

泉水歌古孝子吳公也孝子能潔誠以紀其親維天出泉以助其孝君子樂稱其賢小人喜言其異自孝子歿二百餘年而邦人之飲是泉者尚能道孝子之事而相勸以孝也然人情久則怠余為陳此詩俾歌于其鄉以儆夫怠者焉爾

泉水有源其流不匱邦人來飲思古孝子孝子皇皇

事亡如生克明于紀如聞七聲海濱沮如井渾不灋
登豆攸盛曷用芳潔鷄鳴必興率彼中野有川在野
有甌在荷甌之盈矣望閭而歸衰裳拂拂雨雪祁祁
昊天曰咨孝哉此人何以寵之錫以清泉雷發其伏
地決其脉湜湜瀾瀾其出如射環其倚廬如鑿而成
甌之酌之若取諸罍烹之湘之飲食芬馨溉之濯之
鉶爵清明邦人來觀相告嗟訝爾曹何知理有然者
昊天在上孝子在廬至誠相感如喻如噓感斯應之
居然出泉天人甚邇有孚皆然是孚而大鳳鳥攸儀
孚之一邦維麥兩岐孚于一家雪笋冰鯉有不吾信

觀此泉水孰飲此泉而不勸孝凡厥有親孝子是傲
泉水萬年湛湛如始孝子萬年令聞不已毋滄其流
毋滄其源泉雖在地其來自天

泉水一章六十八句

書濟州新牧韓大叔

億增

扇為別

乙丑

莫以濟遠孰非王臣孰謂濟陋莫非王民清嚴肅下
忠恕衛身蠻貊亦行矧茲濟人

親享 永禧殿訖 賜群臣宴于景賢堂降 聖

製四言詩恭和以進

戊辰

御容新摹兮 親享殿中 穆穆南面兮 聖子在

東 孝思錫類兮願與民同

次退之剝啄行 己卯

退之永叔皆為剝啄行退之憂讒畏謗故客
至而不應永叔休官勇退故客至則欣然今
余有退之之畏而無永叔之勇其詞如此然
究其歸亦同工而異曲耳

剝剝啄啄有客至門我應不疾聲耳何嗔客且安坐
毋我愠然雖我無聰口也能言其發由心如流有源
維質以溫如藉有莞孰為其鉤投人以間孰為其棘
毀人于完心機一動邪氣來干我覺其然語嘿皆難

所以君子好訥惡煩謀生有涯孰敢求全事君有道
豈皆高官我心如水毋作波瀾我行如砥毋事機關
一室空處有嚴天神密相我為降休與艱客嘻而謝
諒哉子云攜手同歸以率我年

恭和 聖製耆老宴 賜詩

維歲己丑我 聖王寶曆為七十有六二月
戊寅 文孫率百僚 上壽于大庭蓋曠古
綈禮也翌月戊子 上命耆老諸臣會讌于
本社 遣承旨宣醕又 賜詩 賜帛亦希
代 寵典也臣雖已告老名忝耆列叨榮盛

筵不勝歡忭頌祝之忱敢用 聖製首句老
字為韻恭賦四言一章以續虞庭賔歌之遺
音

公堂稱爵燕及國老何以寵之有爛 奎藻維醕芳
旨維筐纖縞耆臣百拜歌以天保各獻爾年於萬
壽考臣敢曰老 大恩未報

恭和 聖製養老禮詩 癸巳

閏三月初三日 上用 肅廟故事親臨行
養老禮下 聖製三韻使侍宴諸臣賔進甚
盛舉也臣以耆堂獻詩曰

王受康爵兮 先武是述 黃髮引翼兮其旅亦百

詒謨孔燕兮 祈命維億

假桂不如真竹六首示俞生 以下十三首屬六言 ○戊午

余有月桂一盆俞生拔之易以叢竹余詰其故俞生曰此假桂也不如真竹余聞而有感聊賦假桂不如真竹六首以示

假桂不如真竹汝休分別如許畢竟分別得到欲寔

化翁何處

假桂不如真竹汝休分別如此畢竟分別得過汝將

汝身安置

吾觀物物皆真纔到分別皆假至人辨之多口聖人

依他做過

至人帝之黠奴聖人帝之克子黠奴善移主權克子
善述人事

聖人劇知毋乃只得綱紀一元一元竟時休論論之
厥罪不原

一真一假二辨更容分別三辨不分別又一辨何如
閉口無辨

笑嶺望海示曹生

辛酉

未饒一點山色只見天水相含不知海外何物 聖

恩猶許海南

初有旌義之
命故云爾

圍碁戲吟

余與客圍棋客曰子之舍黑而取白也將謂
白者陽而黑者陰歟余曰然吾自知才弱敵
強子之勝我是子使陰勝陽也客笑曰屈伸
消長固天數也余曰雖然寧為陽屈不為陰
伸寧為陽消不為陰長

一局君且饒我可使陽弱陰強若言成敗在天我也
畢竟為陽

戲竹一首贈宜叔

竹性本自清靜風至乃一婆娑一婆娑尚不可無風

自巖如何

叢玉川水石清竒不下亭淵特色人未之竒耳

始名士灣叢玉余所命也

己卯

山下百曲清川波中萬顆竒石千年一遇雷翁兜童亦知叢玉

簡寄鏡城謫尉金光仲

庚寅

夜夢似送人遷謫贈以六言一首既寤亡其

十二字亦不記其人是誰遂補成一篇以寄

逐臣送盡南鴻床頭惟有

十字補

古易

夢得

請看

二字補

數

枝青松好作一山眉目

夢得

金應教先仲寄示北關詩一軸兼和夢得六言
以來吟賞之餘又書二首于軸尾

澹泊可以明志斯言聖人不易何處嶺海巖廊常留
此時面目

其二

逐臣頭上穹蒼一句可與言易乃知坦坦幽人不媿

昭昭神目

軸中逐臣頭上有穹蒼一句語
可作嶺海人七字符故記之

雷淵集卷之八

